

Buwire á wakita na a puwantaa Paul ge TIMAUTE

Ga use á Paul ge Timaute

¹ Wakita na yá anƙwa á puwetá ba iya Paul, ya slebelá á Yaisu *Almasiihu. Ya slebela áte namaari á Dadaamiya geni yá bálá elva á shifa na a baa Dadaamiya á vaterteva ge emnde na má garevge palle antara Yaisu Almasiihu na. ² Yá puwakte ge ekka wakita na Timaute, ekka na gakevge ba seke egdza-aaruwa wayanak-wáyá jipu na. A magarakanaamaga tara Eddemiya Dadaamiya, antara Yaakadada á miya Yaisu Almasiihu ngurna, a zarakvaarze, a varakteva hairire.

Paul anƙwa á fanem ndzedá am vuwa ge Timaute

³ Yá anƙwa á slafaná we-aaruwa jipu ge Dadaamiya adaba ka. Ba Dadaamiya na yá anƙwa á maganá slera an shaigerire á ervaunƙe-aaruwa ba seke názá á eggye-aha-aaruwa werre na. Vayi vacika, ba kelaa má yá anƙwa á maga maduwa wá, yá anƙwa á yehaka-yeha ekka keni am hufe-aara. ⁴ Am sarte na ya zlálá ázekure, ekka ndza ka kyuwa á ba an yáwe á kyuwa, una nanna zlaƙe anƙwa am ire-aaruwa. Wayanwáyá an ervaunƙe-aaruwa bademme, ganakini yá puwetepuwa ice-aaruwa áte ka, á naatenáhá ervaunƙe-aaruwa an higa. ⁵ Yá anƙwa á slafaná

we-aaruwa jipu ge Dadaamiya á ba ya na wá, adaba diyandiya ganakini faktarfe áte Yaisu *Almasiihu ba jire. Fetarfire á ña ba seke názá á mama-aha á ña tara Luwiz, antara emmeña Aiwnike. Kina wá, diyandiya ganakini fetarfire á ña keni ba seke náza-aatare.

⁶ Adaba fetarfire á ña ñanna wá, yá anƙwa á yehakanteyeha zlaƙe adaliye hákuma na a vaktaa Dadaamiya ge mága slera-aara am sarte na ya puwakar *erva a barka-aaruwa na. Emmága slera an hákuma ñanna, ⁷ gazleka ƙeƙeƙe. Adaba Dadaamiya vamiteka sheƙeƙe na á puwaná vuwa ge ura, amá Sheƙeƙe na ni á vante dzañdzañire ge ura, á vante wáyávire ge ura, ira enƙale ganakini mi ñanaaña vuwa á miya.

⁸ Adaba una ñanna, mañka lyawa ƙeƙeƙe ge mága seydire á Yaakadada á miya. Ma iya na náwa yá am danƙay adaba ñane na keni, mañka lyawa ge ba diyakidiyire. Naba eksarekse ba seke náza-aaruwa, zlaƙa na má a fakaara Dadaamiya adaba slera á labare á higa. Emmága una ñanna an hákuma na a vaktaa Dadaamiya na. ⁹ Dadaamiya wá, a ƙahamitaa ba ñane, a lyamisaa ñane geni mi gevge emnde-aara. A magamiyaa una ñanna adaba shagerire á slera á miya ka, a magamiyaa ba ñgurna-aara, a wayetaa ba ervaunƙe-aara. A magamiyaa ñgurna ñanna kwaye am fakta á duksa baƙemme á kya erva an Yaisu *Almasiihu. ¹⁰ Amá kina wá, Dadaamiya marsemáre ñgurna-aara ñanna ba parakke mazla-aara an sawa á Yaisu Almasiihu Slelyamilya. A se keƙanaa

ɲane hákuma á emtsa, a marese ganakini má lyamivalya labáre á higa wá, mi shansha shifa na á zleka na.

¹¹ Iya wá, Dadaamiya a give slebela á Yaisu Almasiihu ɲanna dɛme, geni yá balaterá labáre á higa ɲanna ge emnde, antara geni yá kwaratersekwáre. ¹² Kina yá am zlada adaba ba una ɲanna. Amá baaka lámbe-aaruwa dɛkidɛki, adaba diyandiya edda una ya fetaara ya áte ɲane. Baaka shaige-aaruwa dɛkidɛki, diyandiya ganakini ɲane á dzegwándzegwa fanu hyema ge duksa ɲanna a yinaa am erva na, dem vaci zla á duniya. ¹³ Ekka keni ndaaternda ka ba elva a jirire na ya ndakndaa na ge emnde an wáyávire, ká ámbera á fetarfe am ervaunɛde á ɲa. Hákuma á emmága una ɲanna wá, mi shanaa á ba áza Yaisu Almasiihu. ¹⁴ Fanufe hyema ba shagera ge labáre á higa na Dadaamiya a yanaa am erva á ɲa na. Fanufe hyema an hákuma na a vaktaa Shedɛkwe Cufedɛde na anɲkwa á njá am miya na.

¹⁵ Bademme á emnde á Dadaamiya na tá am haha á Aziya yariyaaya, diyakdiya ba ka keni una ɲanna. Antara ba tara Figailus antara Hairmauzhaine keni tá á ba am emnde ɲanna.

¹⁶ Amá Aunaizifaur wá, yá anɲkwa á yekanu barka á Yaakadada ge ɲane, antara emnde na tá am hude á há-aara bademme. Adaba ɲane a ekhyiyaa ervaunɛde ba kelaazare, magaaka lyawa dɛkidɛki ge ndavindáva, yá am dangay tsa. ¹⁷ Am sarte na samsa ɲane á sem Rauma, a tatayiyaa an enɲkale-aara bademme, a naba se beribera am tate na yá amkwa. ¹⁸ ɲane

keni a yánka Yaakadada. Kwakyire á slera na a maginaa ñane am Aifaisus wá, ba ka keni diyakdiya. Sey watse á pelansepela Yaakadada vaci tsafaya.

2

*Sawji á Yaisu *Almasiihu an jirire*

¹ Daaci ekka wá, eccena názena yá bakaná ya egdza-aaruwa: Yánya a ndzedáktendzedá ba Yaisu *Almasiihu an ñgurna na a magaminaa ñane adaba gamiyevge palle antara ñane na. ² Elva na ka cenanaa ázerwa, ya balanaa á katafke á zlamaakelaawa na wá, ekka keni vaterteva ge emnde a jirire na ni watse tá dzegwándzegwa kwaraterse ge emnde umele keni.

³ Zladá na má a fakaara Dadaamiya adaba zhera á Yaisu Almasiihu wá, naba ekserekse, gevge sawji á jirire, sawji á Yaisu Almasiihu. ⁴ Sawji á jirire wá, má á kátá háyá áza male-aatare, á duka á dem elva á emnde a ekse defidfeki. ⁵ Ba duksa palle ge emnde a zhagade ganakini á de icaná ware ire. Diyeddiye geni máki edda-aara magaaka názena ta kwaratersekwáre ge maganaa am zhagade-aatare, ñane á shánka duksa na ni tá vaterte ge emnde na ta icanaa itare ire. ⁶ Zlabe adaliye, sleherda na ni ankwá á herdaná fe ge zanwe-aara wá, zlaya á lyevaalya ba ñane zunñwe dza á ñgedepa-aara am duksa na ta halanaa am fe ñanna. ⁷ Eppuwa sawari am ire á ña áte elva-aha ñanna ya tsakanaa ya na, a melakumela

Yaakadada am huɗe-aara ganakini ká diyeddiye bademme.

⁸ Yeheteyeha Yaisu *Almasiihu na a naba tsetaa am faya, ɗane ndza wulfe á *Dawuda na. Kwaya ɗane názu ni ya beranaa ya am labáre á higa na yá aɗkwa balaná ya na. ⁹ Yá aɗkwa shá zlaɗa kina, náwa ta se ɗgudiyaa am dangay keni, aɗaba ba una ɗanna palle. Ta give ba seke ya gu duksa mándzawe. Amá ta dzegwánka ɗgudá elva á Dadaamiya, ɗane á zlala á ba á de katafke.

¹⁰ Aɗaba una ɗanna, ma vaatara keni yá báshá ba zlaɗa ɗanna. Yá bashaná aɗaba emnde na tá an dзера áza Dadaamiya na, geni itare keni a sharánsha lya shifa-aatare áza Yaisu Almasiihu, a sharánsha de nja antara ɗane am yaikkire-aara. ¹¹ Náwa elva a jirire zlaɓe ádaliye yá bakaná ya:

Máki emtsamimtsa kerɗe antara ɗane, ge tse keni, watse mí tsetse zlaɓe ádaliye an shifa antara ɗane.

¹² Máki mí basha zlaɗa wá, watse mí de nja ba kerɗe am yaikkire-aara keni. Amá máki yaminaaya ɗane wá, ɗane keni watse á de yamiyaaya.

¹³ Ma mi eptsantaa miya elva ge ɗaba ɗane keni, ɗane á eptseka elva-aara na a ndaasa áte miya na ɗekiɗeki, ɗane á taa badzanveka elva-aara.

Sleslera na shagera zlááva-aara

¹⁴ Yehateranteyeha elva-aha ɗanna ya bakanaa ya na ge emnde a fetarfe, faterfa magiya ba shagera á katafke á Dadaamiya, geni

a magarka gájáwe am elva. Adaba gájáwe wá, á melanuka ge ura d'ekid'eki, baira á badza emnde a eccena-aara. ¹⁵ Ekka wá, tsaatse ba shagera áte una á kataná Dadaamiya. Gevge sleslera á jirire na á maṅka zherwe am slera-aara d'ekid'eki na. Bateránba elva a jirire na ge emnde an uṅṅule-aara. ¹⁶ Amá gájáwe wá, ekka feka we á ṅa á dem huḍe-aara, adaba baaka nampire-aara, wayaaka Dadaamiya. Emnde a mága una ṅanna ta far ba bádza an Dadaamiya. ¹⁷ Itare ka palle, elva-aatare ṅanna á far ba za slede, ba seke wige na aṅkwa á hwiya na. Tara Himainaiyus, antara Filaistus wá, tá aṅkwa am emnde ṅanna. ¹⁸ Itare wá, jaraaveje áte uṅṅule á jirire. Adaba ta bántsa itare baaka tse á emnde am faya mazla-aara, dedda zamane-aara. Daaci emnde umele yaránya uṅṅule á Dadaamiya adaba lámare-aatare. ¹⁹ Amá jirire á Dadaamiya wá, njaanja degdege ba seke ekte á bere na ni an mága shagera na, baaka gejava-aara. Ta puwetaa áte ekte á bere ṅanna, a ba itare: Yaakadada diyaadiya emnde-aara. Ta puwete zlaḅe ádaliye, a ba itare: Ma a ndasaa ware parakke ganakini ṅane wá, átuge Yaakadada, a maṅka mandzawire mazla-aara.

²⁰ Am mba á emnde a berba wá, aṅkwa kazlaṅa gergere: Gahe-aha gergere antara tasa-aha gergere. Kazlaṅa ṅanna wá, umele ta maganaa an dindar antara lipela, amá umele-aha-aara wá, ta maganaa á ba an haha, antara náfa. Mága slera an kazlaṅa ṅanna keni gergere bademme. Kazlaṅa na an dárádza na, tá maga slera na an dárádza na an ṅane. Amá kazlaṅa

na cekwa dárádza-aara na wá, tá maga slera na cekwa dárádza-aara keni an ñane. ²¹ Ba duksa palle ge miya keni. Edda una an bara ervaunđe-aara, ñane cudfedde am shagerkire ñanna yá anƙwa á ndahaná ya na wá, ñane an fa giraara áza Dadaamiya ba seke kazlaña na an dárádza na, ge maganaa slera á jirire ma vaatara keni. Adaba ñane a yanaa ire-aara bademme ge Yaakadada-aara.

²² Adaba una ñanna, ekka wá, kumeka názena tá kumaná dawale-aha umele an ervaunđe-aatare bademme na, njeka antara jeba á emnde ñanna dekideki. Ekka wá, emmága ba jirire an ervaunđe á ña palle, fetarfe an ervaunđe á ña palle, emmága wáyávire, njawinja lapiya antara emnde na an bára ervaunđe-aatare, tá anƙwa á ñala Yaakadada. ²³ Amá máki tá gá jawe am fida ba dey emnde, bi tá gá jawe arge náza laakire ba dey, duka á dem hude-aara dekideki. Adaba diyakdiya geni á sa ba dágala. ²⁴ Sleslera á Yaakadada wá, á zlayánka dágala. Ñane wá, shagera a gevge slefaterá ervaunđe ge emnde bademme, slekwaraterse duksa an unñule-aara, slekemaare áza emnde bademme. ²⁵ Ñane wá, a kwaratersekwáre duksa an shagerire á ervaunđe ge emnde na tá nyanya elva-aara na keni, ámbane watse Dadaamiya á magateránmaga ngurna, tá de diyeddiye jirire, tá de maga tuba. ²⁶ Daaci estuwa, watse tá diyeddiye názu am shifa-aatare, watse tá sesse am zlegde na a tsagwadatervaa Shaitaine, ma uwe keni tá maganá á ba áte náza-aara na.

3

Názu watse á magava má herzhapteherzhe zla á duniya

¹ Diyeddiye ganakini má herzhapteherzhe zla á duniya wá, watse ankwá sarte-aha na ni zlazladá jipu na. ² Adaba bademme á emnde, ma ware keni watse á dzámá ba ireaara palle, emnde tá de gevá emnde a wáyá shungu an ervaunđe-aatare bademme, tá de maga ba kuráviरे antara gálá ire, tá de valya elva mándzawe áte Dadaamiya, tá de fater-sarka ge dada-aha-aatare antara mama-aha-aatare đekideki. Ma tá melaterumele emnde umele keni, tá de slafateránka we, tá de feka zherwe áte názu am dalbe á Dadaamiya đekideki. ³ Emnde tá de gevá mándzawe-aha á ba am huđe á há-aatare keni, watse baaka zevarzire ázetare đekideki, tá de valya ba elva mándzawe, watse slera-aatare ba dágala. Emnde tá de tsufeteka we-aatare đekideki, ervaunđe-aatare á de yanaaya jirire ba đekideki. ⁴ Zlađe ádalíye, emnde tá de ndaha ba elva á fitenire áte ura, tá de dzameka názu á katafke watse á saterná mága-aatare nanna, itare tá de gálá ba ire, tá de đaba ba emtakire á duniya arge đaba Dadaamiya. ⁵ Jeba á emnde nanna wá, watse ta ba seke emnde á Dadaamiya đeme, amá wá, eksaranteka hákuma-aara ganakini á gatervege emnde-aara á ba an jirire. Ekka wá, njauka antara jeba á emnde nanna đekideki.

⁶ Jeba á emnde nanna wá, ba kina keni emnde umele-aatare tá ámberá á ba ngyangye á dem huđe á há á emnde an nasherire, tá de zlerma

ɲwasha na tsemarka ire-aatare na, ganakini tá lyevaalya elva-aatare, tá maga ba názena á kataná ire-aatare na, tá tegaavka an haypa deki. ⁷ ɲwasha ɲanna keni ba kelaazare tá tsaha ba duksa tsa, amá tá cenvaaka jirire á Dadaamiya deki. ⁸ Emnde a de zlerma ɲwasha ɲanna wá, ta yanaa á ba an ervarva jirire á Dadaamiya ba seke náza tara Yannais antara Yambairais na ndza ta yaa elva á Muusa werre na. Emnde ɲanna badzavbadze enkale-aatare, tá fetarka an unɲule-aara deki. ⁹ Amá watse tá zlaleka á de katafke an slera-aatare ɲanna, adaba watse kwakya emnde na tá de diyeddiye ɲgudiyire na tá maganá itare, ba seke una ndza ta disaa emndu werre náza á tara Yannais, antara Yambairais na.

Tsaatse á ba áte názena ka tsasaa ka

¹⁰ Amá ekka wá, diyakdiya názu yá anƙwa á kwaratersa ya ge emnde, ba palle keni á kedakarka deki. Zlalava-aaruwa, názu yá kwamaná ya am slera-aaruwa, fetarfire-aaruwa an Dadaamiya, farvaunde-aaruwa, wáyáva-aaruwa, ira dzaɲdzaɲire-aaruwa am elva á Dadaamiya, bademme diyakdiya. ¹¹ Zlabe adaliye, ekka diyakdiya palasa na ta magiyaa emnde, antara zladá-aha-aaruwa umele am Antakiya, antara am Ikauniya, ira am Listira. Ma nanánna zladá keni, enzlisenzle Yaakadada am zladá-aha ɲanna bademme. ¹² Deme keni wá, emnde na ni garevge palle antara Yaisu *Almasi-ihu tá kátá njá áte una á kataná Dadaamiya wá, itare tá nanna palasa áza emnde. ¹³ Amá emnde a mándzawe antara ɲgudí-aha ɲanna wá, baaka

tsemartse-aatare dekidfeki, zlalava-aatare á de far ba bádza, adaba á kedfaterá shaitaine, lauktu itare keni tá de kedfa emnde umele ñanna.

¹⁴ Amá ekka wá, tsaatse á ba áte názena ka tsasaa ka, ka lyevaa an ervaunđe á ña palle na. Adaba diyakaterdiya emnde na ni ta kwarak-sekwáre na, diyakdiya ganakini ta kwarak-saa á ba an ervaunđe-aatare palle. ¹⁵ Tsaatse á ba áte názena ka tsasaa ka, adaba ka waltaa á ba an diya názu am wakita á Dadaamiya. Daaci wakita ñanna á dzegwándzegwa vakte enkale ge d'aba unñule a lya, ganakini a lyakaalya Dadaamiya adaba fetarfire á ña áte Yaisu *Almasiihu. ¹⁶ Bademme á duksa na ni ta puwetaa am wakita á Dadaamiya na wá, a baternaa ba ñane an hákuma á Shedekwe-aara ge emnde ñanna. Á kwaramisá ba wakita ñanna jirire á Dadaamiya, á maraná ñane haypa-aha á miya, á tsamimare ba ñane am bádza-aha á miya, á kwaramisá ñane zlaláva a jirire na á kataná Dadaamiya. ¹⁷ Bademme á una ñanna wá, ba ganakini ura á Dadaamiya wá, a jerka duksa mándzawe áte ñane. Ma vaatara keni ñane wá, á njá á ba am niya á mága duksa shagera.

4

¹ Náwa názu yá ndaaka ya adaba Dadaamiya, antara adaba Yaisu *Almasiihu na watse á kyáná ñane shairiya á emnde a faya, antara náza á emnde na tá an shifa bademme na. Yaisu wá, ba jirire watse á sawa, á se maga sleksire-aara. Yá anñkwa á ndaaka adaba una ñanna: ² Ekka wá, ndaternda ka ba elva á Dadaamiya ge emnde

an ndzedá á ña bademme, a kezlaran̄ka elva á ña defekideki. Wayarwáyá an wayarka keni naba ndaterndaa ka, marateránmára haypa-aha-aatare ba parakke, valaterarvale ba shagera, fateremfa ndzedá am vuwa, kwaratersekwáre duksa á ba an farvaun̄de. ³ Emmága una ñanna. Adaba an̄kwa á sawa sarte na ni watse emnde tá ceneka jirire na tá de kwaratersekwáre defekideki. Watse hyema-aatare á kátá cena ba shagerkire na tá kataná itare, daaci watse tá jáháva á ba á deza malum-aha á fida na tá kwaraterse ba názena emtake am hyema-aatare na. Malum-aha ñanna keni watse ta vayye jipu. ⁴ Watse emnde tá ceneka jirire mazla-aara, watse tá jáháva á ba áza emnde a bálá fida ñanna. Una ñanna názena tá de fa hyema emnde ge eccena-aara. ⁵ Amá ekka wá, tsaatse á ba áte slera á ña, ebbálá labáre á higa. Gevge slefarvaun̄de am zladá, maganaamaga slera na a fakaara Dadaamiya bademme.

⁶ Náza-aaruwa wá, yá haraaka kwakya mazla-aara, zlauzla sarte-aaruwa, yá de gevá ba seke sadake na tá vante ge Dadaamiya na. ⁷ Iya zlanuzle am wáva-aaruwa á ba an un̄jule-aara am slera á Yaisu *Almasiihu. Magannaamaga názena a fiyaara Dadaamiya, ganevge ba seke edda una ni a icanaa ñane ire am zhagade, ganakini watse á de icaná ware ire. Kezlananveka fetarfire-aaruwa áte názena mi fetaare átekwa. ⁸ Kina wá, tá an̄kwa ufiyá an lada na tá de tegater ge emnde a jirire vaci shairiya. Lada ñanna á de vitá ba Yaakadada an erva-aara, ñane edda á shairiya á jirire. Á de vite

ge iya ka palle, amá ge emnde na ni wayaawáyá ervaunċe-aatare an sawa-aara bademme.

Ba Yaakadada palle una aṅkwa antara Paul

⁹ Emmága watsewatsire se beribera áhuna, shekwaaka dekideki. ¹⁰ Yiyaaya Daimas zlazlálá á dem Taisalauniki, adaba ṅane a hayaa ba duniya na. Kairaiskais wá, ṅane a dem Galatiya. Titus a dem Dalmatiya. ¹¹ A juwa ba Lukas palle ázerwa. Má ká sawa ṅanna wá, siyánsa Markus am erva, adaba ṅane á meliyumele jipu am slera-aaruwa. ¹² Tikikus wá, ṅane ya belanaa ba iya á dem Aifaisus. ¹³ Má ká sawa wá, dedde á kya Terauwas, lyivaalya nanḡyuwe á ekhye-aaruwa ya yanaa am mba á Karpus, haliyantehálá antara wakita-aha-aaruwa keni aṅkwa ya yanaa áhuwa. Wakita-aha ṅanna, kwakya-aara yá kátá ba una-aha na ta maganaa an gwagwana.

¹⁴ Alaikzandere edda á egzla wá, magiyánmaga emtaṅkire kwakya. Duksa na a magitaa ṅane na wá, sey á de kyaná ba Dadaamiya shairiya-aara. ¹⁵ Ettsufa ire á ṅa. Ekka keni á de magaktemága ba estuwa. Adaba ṅane yanaaya ervaunċe-aara elva na mi kwaratersaa miya ge emnde na.

¹⁶ Vacite na ta di ge zuṅṅwire á de katafke á shairiya ganakini yá ndaasende jirire-aaruwa wá, palle á ura a tsifetse baaka dekideki, bademme á emnde yariyaaya. A dateránda Dadaamiya gabela. ¹⁷ Amá wá, ndza aṅkwa Yaakadada antara ya, a vitaa ṅane ndzedá. An

ndzedfa na a vitaa ñane, ya magaa waazu á elva-aara bademme á dem hyema á emnde a larde gergere. Enzlisenzla Yaakadada am mbuwe á ervare. ¹⁸ Baaka shaige-aaruwa dekideki, ma am lámare-ara keni á de ñezlisenzla Yaakadada, á diyaada ba lapilayye á dem zlan-na-aara am samaya. Yaikkire ba náza-aara palle, dem ba ge dekideki. *Aamin.

Paul anƙwa á gater use-aara ge emnde umele keni

¹⁹ Gaterga use-aaruwa ge tara Akilas, antara mukse-aara Piriskila, ira emnde á Aunaizifaur.

²⁰ Airastus, ñane anƙwa am Kaurintus duksa-aara. Tauraufimus wá, ya yanaa am Milaitus adaba á wáná vuwa-aara.

²¹ Emmága watseswatsire ganakini ká saasa á sehuna lauktu á sawa sarte á ekhye.

Tá anƙwa á gak use-aatare tara Aiwbulus, Pudais, Linus, Kalawdiya, antara egdzar mama-aha á miya emnde a fetarfe na tá áhuna bademme. ²² A njiinja Yaakadada antara ka. A magakuránmaga Dadaamiya ñgurna ma ge ware á kure keni bademme.

Wakita á Dadaamiya
La Bible en wandala

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

dec75dd5-4784-5059-aa00-668d508a6b0d